

四庫全書

子部

欽定四庫全書

居易錄卷十

刑部尚書王士禎撰

國子監博士孔尚任字東塘曲阜聖裔博雅好古丙寅
丁卯間從故工部侍郎孫圻瞻

在豐

治下河在江都得漢

銅尺一上有文字曰慮虎銅尺建初六年八月十五日
造後又得一尺定為司馬文正公布帛尺也孔自作漢
銅尺記周尺考周尺辨三篇極精核今備載於左方漢
銅尺記云江都閔義行博雅好古所藏銅尺一朱碧繡

錯為賞鑒家所玩余既得之乃不敢以玩物蓄焉古者黃鍾律歷疆晦冕服圭璧尊彝之屬皆取裁於尺而周尺為準自王制不講鄉遂都鄙之間各從其俗於是布帛營造等尺代異區分遺法蕩然況禮樂之大者乎此尺有文曰慮虎音慮夷銅尺建初六年八月十五日造慮虎乃太原邑建初則東漢章帝年號也考章帝時冷道舜祠下得玉律以為尺與周尺同因鑄為銅尺頒郡國謂之漢官尺此或其遺與漢代去周末遠且禮經皆出

漢儒漢尺之存即周尺之存也聞之先王制法近取諸身遠取諸物然後尺寸之度起何休曰側手為膚按指知寸布手知尺此則尺之取諸身者也律歷志謂一黍之廣為分十分為寸十寸為尺此則尺之取諸物者也指有長短黍有巨細每不相符漢儒因有指黍二尺之辨此尺取指取黍固不能定今以中指中節量之適當一寸無毫髮差及累黍試之正足一百何指與黍之偶符若此耶廣一寸厚五分重抵廣法十八兩歸之闕里

凡造禮樂器皆准之准周尺也周尺考云虞書同律度量衡三代共之至秦不師古而後紛綸莫定迨六朝割裂之餘乃有大升大兩長尺不等當時調鍾律測晷景及冠冕禮制用小者餘公私俱用大者宋人考定制度集古尺法為十五種曰周尺曰晉田父玉尺曰梁表尺曰漢官尺曰魏尺曰晉後尺曰後魏前尺曰中尺曰後尺曰東魏後尺曰蔡邕銅籥尺曰宋氏尺曰隋水尺曰雜尺曰梁俗間尺而必以周尺為之本蓋非周尺無以

定諸尺之失蔡邕獨斷曰夏十寸為尺殷九寸為尺周
八寸為尺何以知其八寸為尺也王制曰周尺八尺為
步司馬法曰一舉足曰跬跬三尺兩舉足曰步步六尺
儀禮注武跡也中人之跡尺二寸五武為步步六尺故
禮書以周六尺四寸為步又說文曰伸臂一尋八尺徐
鍇曰六尺曰尋小爾雅曰四尺為仞倍曰尋邕咸鄭康
成皆以仞為七尺應邵以為五尺六寸顏籀曰八尺為
仞取人臂一尋語為山九仞釋文曰仞七尺孟子掘井

九仞註仞八尺然皆不越乎八與六之間故禮書以周六尺四寸為尋六尺四寸者十寸之尺也十寸之尺六尺四寸乃八寸之尺八尺也兩足步之如是兩手尋之亦如是按禮記周尺鄭註周猶以十寸為尺六國變法度或言周尺八寸然亦非也所云周尺八寸者蓋以當時所用尺較周尺之長短止當八寸故云周尺八寸而非但用八寸也考工記于案言十有二寸於鎮圭言尺有二寸則是周之長尺有十寸周之短尺亦有十寸文

公家禮言古尺五寸五分周尺七寸五分則又以宋時布帛尺較之矣郎瑛曰周八寸為尺秦比周七寸四分

前漢官尺比周一尺三分七毫劉歆銅斛尺後漢建武

銅尺與周同

建初間得周玉律以為尺謂之後漢官尺疑非建武

三國蜀吳同周

魏比周一尺四分七毫後魏前尺比周一尺二寸七釐

中尺比周一尺二寸一分一釐後尺比周一尺二寸八

分一釐晉田父玉尺

世說田父於野中得周時玉尺

與梁法尺比周一

尺七釐後晉比周一尺六分二釐宋齊尺比周一尺六

分四釐梁表尺比周一尺二分陳尺同後晉東魏比周

一尺五寸八釐市尺與後魏後尺同隋開皇官尺同上

市尺官尺
皆鐵尺
萬寶常所造木尺比周一尺一寸八分六釐

以前多銅為
之至此用木
唐尺與古玉尺同
貞觀中武延秀為太常得玉尺以為奇玩獻而

失之其迹猶存
所定得六之五
開元尺度以十寸為尺尺二寸為大尺

五代世短多相應襲志無考也惟周王朴所定尺比周

一尺二分有奇及宋二景表尺比周一尺六分有奇胡

瑗樂書黍尺比周一尺七分司馬光布帛尺比周一尺

三寸四分元尺傳聞至長志無考明部定官尺皆依家
禮布帛尺凡田畝布帛營造所用悉同雖南北稍有參
差然必以部定官尺為準五尺為尋十尺為丈一百八
十尺為一里五尺為步十尺為弓二百四十步為一畝
茲建初銅尺當明所用官尺七寸五分明所用官尺即
宋布帛尺也布帛尺比周一尺三寸四分固知銅尺與
周尺無二周尺八尺為步八尺為尋今以銅尺較止足
六尺六寸五分或者今人身短小故步尋較古減一尺

若用明官尺六尺為步六尺為尋而銅尺乃足八尺之數若再分銅尺為八寸更益二寸則是古十寸尺當得六尺四寸之數我

朝丈田稍增尺數每尺加一寸以明官尺五尺五寸為一步尋而銅尺又當用七尺四寸矣去古日遠遺法莫考幸得漢銅尺與周尺相准歷代制度了然無疑因詳書之以俟後賢參考焉周尺辨云世儒考制度皆本周尺蓋三代損益惟周為詳本之是已然亦何所得周尺

而本之哉或者皆臆說耳宋潘時舉註家禮曰程先生
木主之制取象甚精可以為萬世法然用其制者多失
其真往往不考周尺之長短故也蓋周尺當今省尺七
寸五分弱而陳氏文集與溫公書儀多誤註為五寸五
分弱而所謂省尺者亦莫知其為何尺時舉舊常質之
晦翁先生荅云省尺乃是京尺溫公有圖所謂三司布
帛尺者是也繼從會稽司馬侍郎家求得此圖其間有
古尺數等周尺居其右三司布帛尺居其左以周尺較

之布帛尺正是七寸五分弱因圖二尺長短而著伊川之說於其旁庶幾用其制者可以曉然無惑余觀家禮三尺圖各分十寸為冊幅所限僅圖尺形而非尺准也其古尺圖註云當今省尺五寸五分弱周尺圖註云當三司布帛尺七寸五分弱當浙尺八寸四分三司布帛尺圖註云即是省尺又名京尺比上周尺更加三寸四分當周尺一尺三寸四分當浙尺一尺一寸二分蓋司馬公家有石刻本故其說可據今刻本已不可見而世

但以家禮所圖為尺式豈知乃尺形非尺准也如為尺
准何以短二寸五分之周尺與長三寸五分之布帛尺
式相等耶世儒紛紜傳會止據家禮之尺形余故知其
皆臆說也今既得建初銅尺與周尺同周尺既定何尺
不定因定曰建初銅尺與周尺同當古尺一尺三寸六
分當漢末尺八寸與唐開元尺同當宋省尺七寸五分
當宋浙尺八寸四分當明部定官尺七寸五分弱當今
工匠尺七寸四分當今裁尺六寸七分當今量地官尺

六寸六分當今河北大布尺四寸七分余之能定者以有建初銅尺在也設無之此說亦臆矣

予鄉文獻舊家以臨朐馮氏為首初閭山公裕居遼東從賀醫閭學中正德進士官止副使歸居青州有四子惟健舉人惟重進士官行人惟敏舉人官通判惟訥進士官光祿寺卿惟訥字汝言最有文名著古詩紀風雅廣逸諸書惟健字汝強以詩名惟敏字汝行詞曲為明第一手惟重字汝威名稍遜伯叔季而其子子咸以進

士官給事中夢天帝以韓魏公為其子遂生文敏公琦
官至禮部尚書號文章經濟大儒光祿曾孫易齋公溥
本朝官少傅文華殿大學士兼刑部尚書數代皆有集
傳於世

院寺舊無員外主事之名後翰林院起居注添設主事
四員太僕寺員外郎八員皆以滿洲人為之

同年僉都御史陳省齋肇昌黃岡人有六子次子大章
康熙戊辰進士翰林庶吉士第四子大羣五子大華庚

午同捷楚榜大華又解元也是科長子大年亦中順天副榜第一省齋即於是冬擢僉憲父子兄弟極一時之盛朝士榮之後幼子大輦又中壬午鄉試

陳司空說巖招同朱竹垞姜西溟飲觀東坡穎沙彌書迹帖凡數百字甚奇又觀劉松年宮蠶圖

門人蒲城趙舉人善昌貽曹全碑碑在漢隸中最高為完好書法圓美此碑萬歷時出於邵陽歲月未久故鮮剝缺趙岵石墨鐫華于奕正金石志始載之都元敬著金

薤琳琅未及見也碑尾署中平二年十月丙辰造

郭祥正功甫青山集閩謝氏寫本六卷古詩二卷近體
詩四卷七言歌行僅二篇或有闕文也祥正多與王安
石倡和之作李之儀晚居姑孰與祥正有隙至為詩排
詆最力蓋各有所主也方安石當國祥正上言請以天
下大計專聽相公區畫罷一切異議者其人可知已詩
格亦不高偶喜其三絕句云原武城西看杏花紛紛紅
雪委泥沙何如姑孰溪頭見照水蒙烟小謝家又渡江

乘興泊江干草襯殘花色未乾慣在釣魚船上住一簑
一笠伴春寒又籃輿投曉出重城桃李無言似有情淡
白輕紅能幾日可憐吹洗過清明又稻秧才一寸蠶子
始三眠句

張光啟字元明章邱人世居白雲湖上少為諸生有名
為梅長公朱未孩二公所知崇禎庚辰年四十遂棄諸
生闢一圃曰省園以種樹藝花自樂亂後足不履城市
年八十餘卒有張仲集詩若干篇予刪存百餘首往往

可傳嘗有句云盡日閒看高士傳一生怕讀早朝詩即其志可知也

宋時士大夫多重充墨余已記之前卷讀范忠宣公集有充墨詩云誰熱長松製作勤輕煤勻膩雜蘭薰中疑元石無纖翳外似靈犀有密紋溪石乍研浮紫翠蜀牋試寫落煙雲會將點畫傳青簡千古忠邪為爾分忠宣公不以詩名五言如溪風消酒力煙樹入春愁最工

李戶部說蜀有墨猿通體黝黑可愛常於樹上騰跳足

不履地獵者不能獲又有謳猿其聲如謳

四川道監察御史陸龍其疏言孝道為萬事之本奪情
非治世所宜仰祈

聖斷以維綱常事臣辦事署中聞九卿科道會議湖南
巡撫于養志在任守制一事臣以資淺不在會議之列
不知所議云何及詢與議諸臣謂會議之時昌言其不
可者固有其人而依違不斷者比比而是臣竊怪之此
明白顯易之事有何可疑而依違若是夫治天下之不

可不以孝易明也在任守制之非所以教孝易明也天下正當承平之時湖南又非用兵之地無藉於在任守制易明也

皇上以孝治天下在廷諸臣沐浴於

皇上孝治之中久矣何難一言直斷其不可耶且臣不知議者以于養志為何如人如其非賢者耶則固不當使之在任守制矣如其誠賢者耶則必不肯安心於在任守制矣在督臣代為題請或從愛惜人才起見然臣

以為使之解任全孝正所以深愛惜之况

皇上一日所行天下萬世奉為法程者也若使一撫臣
因督臣之題請而留將來督撫之丁憂者皆將援此以
為例其不思僥倖奪情者鮮矣名教自此而弛綱常自
此而壞此端一開關係天下實非淺鮮至於湖南一省
之人是則是做不復知有父母又無足論矣云云龍其
字稼書平湖人庚戌進士初官嘉定知縣有廉名巡撫
慕天顏惡之疏劾降級故尚書魏敏果象樞力言於朝

得還職補靈壽知縣今年夏五月

詔九卿舉廉吏龍其與三河知縣彭鵬清苑知縣邵嗣

堯麻城知縣趙蒼璧四人奉

特旨行取彭給事中邵陸趙三人俱御史

梅

文鼎

字定九宣城諸生也著中西算學通若干卷中者

中國之法西者泰西之法也其書有九一曰籌算

目有七曰

乘除平方立方帶縱平方帶縱立方開方捷法開方分秒

二曰筆算

目六曰加減乘除異乘同除開

方法其別有二曰

三曰度算

目十曰平分線分面線分體線更面線更體線分圖

線正弦線割線切線五
金線其別為矩算

四曰比例算

目三曰比例四線新比例

五曰幾何摘要

目三曰線面體

六曰三角法

目二曰平三角弧三角

七曰

方程論

目六曰正名極數致用刊誤測量雜法

八曰勾股測量

目三曰測高測深測

遠

其別有六曰矩度矩尺象限儀鏡測笠測扇測

九曰九數存古

目九曰方田粟布差分少

廣均輪商功盈不足方程勾股

梅精於歷學嘗合七十餘家著歷學通

考亦今之異人也

予家世業毛詩幼時即疑晦菴臆改小序之非宋元明

已來駁之者甚衆非予創論也嘗欲輯歐蘇呂嚴諸家

之說作為一書嘗著其說於木瓜詩辯猶恨藏書少耳
頃得崑山新刻經解又數種如逸齋補傳成伯璵指說
李樗黃榦集解朱倬疑問朱善解頤詳略雖不同要皆
可互相發明獨王栢詩疑輔廣童子問朱鑑遺說朱升
旁注傳會固陋無足采錄

武昌舉人葉道復以其父工部主事井叔

封

遺詩來并

叔本嘉興人寓黃州順治己亥進士篤實君子也由登
封令入為兵馬司指揮其族弟文敏公方藹介於予以

詩來質予盡刪其舊作獨取其嵩山詩五六十篇為嵩
遊集序而刻之又選其己未庚申詩刻之列其詩於十
子中於是井叔之名益噪康熙己未以博學宏詞徵罷
歸及吏部銓授虞衡司主事而井叔已前卒年六十餘
矣井叔精爾雅說文學有根柢所輯嵩山志嵩山石刻
集記皆可傳

井叔未第時酷貧嗜讀書家樊口湖中王宗伯吳廬

澤宏

常扁舟過之值湖漲不辨涯涘日已暮聞有書聲出蘆

荻中先悲哀而後愉樂曰此必井叔也迹之果然

文則詩則各三卷周居岐撰居岐字伯康號與泉濟南
歷城人嘉靖間官當塗知縣周吾里前輩無詩文名然
其自序二篇甚有理致

潁川劉氏閨閣皆知書同年公馭吏部往為予述其女
姪名第五幼工詩兼能古文從姪搢妻李氏亦工詩予
壬子使蜀時播令洪洞李以詩卷來相質今皆歿矣第
五之女姪名令佑嫁為公馭甥甯擢益賢子婦今年才

二十詩詞書迹以至金石篆刻皆臻妙何巾幗之多才也嘗為予刻二小印款云潁川女士

康熙三十年辛未元旦

上御太和門受朝賀午

賜宴召滿漢內閣大學士學士六部尚書侍郎都察院都御史副都御史上殿

賜酒是日風日暄霽仰瞻

天顏悅豫羣臣皆喜

以太僕寺卿李元振為都察院左副都御史

胡副憲昇猷以疾卒

位於

命禮部尚書熊賜履兵部督捕侍郎王士禎俱以原銜充

經筵講官先是大學士徐公元文以兼領翰林院掌院事不解講官去年某月罷禮部尚書張公玉書為文華殿大學士例解講官翰林院以部院由翰林出身諸臣名上留中數月至是以仲春

經筵屆期特有是

命士禎以菲才與焉既感

聖恩高厚益自愧報稱之難也

二月初二日同兵書李公天馥刑書杜公臻工書陳公
廷敬吏侍李公振裕赴

起居注館會看

經筵講章先是翰林院進擬題目

欽點孟子后稷教民稼穡一段尚書六卿分職一段講

章則張公英及陳公撰也

以大理寺少卿唐朝彛為太僕寺卿山東布政使衛既
齊為順天府府尹

初六日晨內閣九卿啟

奏乾清門辰刻奉

旨以戶部尚書文華殿大學士張玉書

經筵講官工部尚書陳廷敬兵部右侍郎李光地

經筵講官兵部督捕右侍郎王士禎為會試主考官禮

部左侍郎王颺昌為知貢舉官同考十八人翰林院編修許承家等七人兵科掌印給事中卞三畏等四人吏部郎中鍾儀傑等七人宴於禮部

賜金花綵緞表裏各有差宴畢入鎖院

二十七日恭呈十卷進

御覽次日奉

旨著考試官自定次第先是二十四年乙丑科會試主

考官刑部尚書張公士甄

今吏部尚書

等始進擬十卷恭請

上裁

欽定名次以陸肯堂為第一戊辰已來遵為定例然戊辰亦未

欽定云

三月初一日放榜中式舉人百五十六人會元張瑗江南祁門人滿洲巴海等四人烏金超哈胡麟徵等二人以試監察御史邵嗣堯為直隸守道叅議舊例科道官非外轉無出為監司者至是守道缺奉

特旨直隸守道員缺緊要著以邵嗣堯轉補重其選也
掌河南道監察御史王承祐疏請以安慶廬州鳳陽三
府滁和徐三州仍歸南卷舊例會試以廣西四川雲南
貴州四省及江北三府三州為中卷自丙辰科以滇黔
亂去中卷之名以三府三州歸南卷雲南平復舊是科
榜發廣西雲貴三省遂無一人入彀者故言官有是請
部議允行

徐編修元正子貞貽石門呂氏新刊司馬文正公稽古

錄二十卷首有文正公進表一首朱文公與鄭知院書
以為此書當與六經同進講筵云

貴州巡撫田中丞子綸雯寄所著黔書乞序中述名宦
頗及先太僕太師二公太僕嘉靖中官貴州監司歿於
黔今永寧衛有專祠太師則萬厯中以兵侍總督川湖
貴州軍務云

盤山拙菴智朴禪師以所創山誌若干卷屬叅訂頗有
體裁所錄碑刻詩文等亦不汎濫所述山中物產一卷

尤雅

田子綸中丞作黔書凡七十六篇篇不一格其記苗蠻
種類記水西烏蒙馬記革器記朱砂水銀雄黃凱里鉛
鋤醬印竹諸篇有似爾雅者似考工記者似公穀檀弓
者似越絕書者讀之如觀化人之戲故相國孫文定公
止亭作顏山雜記記山蠶琉璃窑器煤井鐵冶等文筆
奇峭亦如此

戊辰春予來京師朱太史竹垞招飲古藤書屋食半翅

甚美不知是何鳥閱盤山新誌云爾雅鷦鷯冠雉郭璞
注鷦鷯大如鵠似雌雉鼠脚無後指岐尾為鳥慙急羣飛出
北方沙漠盤山多有之土人呼為半翅即沙雞也一名
鐵脚

拙菴山居詩有極似寒山子者其佳句如雪衲經時補
春新帶雨燒青溝一派水紫蓋萬重山閒心將白日隨
意斬青茅木蛇鱗甲異俊鷁羽毛青蒲團安養地秋色
淨居天鬢從新處白天自舊來青竹牕來夜月茆屋隱

春雲皆可誦

庚午於慈仁寺市得如臯孫應鰲淮海易談四卷每舉以語揚之士大夫訪其他所著書輒無知者讀黔書乃知公字山甫本如臯人籍清平衛嘉靖己酉舉貴州鄉試第一癸丑進士改庶吉士歷僉都御史撫治鄖陽入為大理卿以禮侍掌國子監祭酒事終南京工部尚書萬厯庚子黔撫郭子章為請諡諡曰文恭始青螺入黔鄒南臯謂之曰黔孫淮海李同野馬心菴皆致力道學

君此行惜不及見三君耳又胡正甫語青螺宇內講明
正學楚有黃安耿公蜀有內江趙公黔有清平孫公豫
章有南城羅公孫公著述有學孔精舍類稿教秦語錄
春秋節要律呂分解等書易談其一耳

史多曲筆所謂盡信書不如無書也漢昌邑王之事吾
嘗疑之及讀東坡所論始暢然坡云觀昌邑王與張敞
語真清狂不慧者烏能為惡既廢則已矣何至誅其從
官二百餘人以吾觀之從官中必有謀光者光知之故

廢賀非專以淫亂故也二百人者方誅號呼於市曰當斷不斷反受其亂此其有謀明矣特其事秘史無緣得之著此者亦欲後人微見其意也武王數紂之罪孔子猶且疑之光等數賀之惡可盡信耶論世者須具如此識力乃不墮古人雲霧中

十八日

萬壽節

上不受朝賀免廷臣進表惟在外督撫進表如故

二十三日

御太和門傳臚

賜中式舉人戴有祺及第第一初讀卷官內閣九卿擬
吳昺第一有祺第二楊中訥第三既進

御覽改有祺第一昺第二黃叔琳第三中訥居二甲之
首昺全椒人故禮科給事中龍子對策倣陸宣公奏
議

上以書法拔有祺狀元而昺次之又以鼎甲久無北人

拔叔琳次曷叔琳大興人中訥海寧人同年兵部左侍郎雍正子遇合之有定數如此

有祺戊辰進士休寧人籍華亭

本朝狀元非本科中式者壬辰之鄒修撰忠倚己丑中式甲辰之嚴侍郎我斯榜眼李都御史元振皆辛丑中式及此而三

添設盛京兵部調兵部左侍郎舜拜為盛京兵部侍郎盛京舊止設戶禮刑工四部侍郎及郎中等官至是奉

旨添設戶科給事中王原祁因疏請倣明南京例并添設漢侍郎以下下九卿詹事科道會議不行

曷試卷在會闈予所特拔及拆號王少宗伯吳廬亟稱之明旦榜發入

朝遇李少宰醒齋

振裕

王閣學鶴汀尹方皆為主司賀得人

李前督江南學政王即庚午江南鄉闈主司也曷父伯叔兄弟五人進士第者凡四其世父國對順治戊戌一甲第三人也兄晟丙辰進士從兄昇戊午舉人蓋家學

云後其弟早又中壬午順天鄉試

人家科第在積學種德堪輿之說非所論也然亦有灼然可信者門人全椒吳昺述其曾祖體泉翁為父卜吉壤致閩人簡堯坡者於家廩餼甚厚簡日為擇兆域三年不可得辭歸翁固留之一日同往梅花山中遇大雪同飲陳家市酒樓簡倚檻遠眺久之罷酒起曰異哉吾遠近求之三年不得乃在此乎遂同往三里許審視良久曰是矣雪晴更往觀之喜曰天賜也得此地足報君

矣然葬後君子未即發至孫乃大發發必兄弟同之對
面文峯秀絕發必鼎甲然稍偏未必鼎元或第二第三
人亦不僅一世而止翁如言卜葬其後孫國鼎字玉鉉
中崇禎癸未進士國縉字玉林順治己丑進士國對玉
隨國龍玉騶學生玉隨順治戊戌進士及第一甲第三
人官翰林侍讀玉騶亦癸未進士官禮科都給事中至
曷兄弟又前後舉科第而曷今辛未科及第一甲第二
人簡之術亦神矣

兵部職方司督捕主事齊祖望雞澤人予令訪其縣人
殷岳伯巖遺集得留耕草堂詩一卷僅讀史三十首登
嵩登岱詩各六首餘十八首共五十餘篇皆五言古體
也殷平生不為律詩永年申涵光和孟序之云宗山不
多作詩復不耐聲偶為古詩淳龐淵穆莽莽可敵萬夫
乙未正旦祀先畢即皐帽跨驢攜一童子遊嵩少婆娑
巖嶺有遺世之思已乃入大駟大駟人好之留數月予
與傅掌雷太史將登岱宗山衣塵未拂欣然同往時方

病腰脊比歷天門松聲謾謾萬山在下大叫奇絕棄肩
輿步登不知沈疴之去體也夜宿岳頂予二人憊而偃
卧宗山夜數起謂羽人日出時喚我已而雨聲浙瀝少
止即躍起視戶外以星辰隱見為憂喜竟夕不寐其嗜
奇癖山水如此宗山亦殷字也予往見其咏史詩於國
門集古鬱涼壯有橫槊之風河朔一奇士也和孟節愍
公子有高義與予兄弟相友善同時有張蓋字覆輿狂
士詩亦奇皆廣平人又趙湛秋水劉逢源津逮亦廣平

人能詩皆與予善

王侍郎損仲

惟儉

留心宋後三史苦宋史煩蕪刪定成書

吳興潘昭度鈔得副本損仲家圖籍沈於汴京之水未
知吳興鈔本云何庚午歲石門呂葆中無黨遊太學至
京師予見其行笈有此書蓋即潘本塗乙宛然凡二百
五十卷首紀次表次傳次志紀十五表五列傳二百志
三十通為宋史記其義例大畧本紀則更瀛國公為帝
累增端宗帝昺二紀年表於宰輔外增南唐諸國及遼

金二表而附以夏國宗室傳於英宗皇考濮王孝宗皇
考秀王之後增理宗考榮王希璠改南唐北漢世家依
漢書項羽例總名列傳宰執中如王安石之亂法耿南
仲之悞國皆特書以示戒若庸臣如李昌齡姜遵輩倣
漢書陶青劉舍之例止於他傳未附見姓名年表具爵
位而已史彌遠嵩之一代窮奇李知孝梁成大相門鷹
犬舊史於二史虛事褒揚梁李徒有官簿并從刊正諸
史止有儒林宋史始列道學道學之目乃賈同胡紘諸

奸創之以攻朱熹者今刪去道學通曰儒林舊史奸臣傳倣新唐書例然既列惇布諸人而史彌遠之易皇嗣史嵩之之酖直臣罪豈可賞史家據事直書忠邪自見不必復別之為奸始足懲戒也若薛昂羅汝楫陳自強

王次翁之流皆附諸奸本傳之下志則歷法

刪天文五行二志

郡邑禮

儀衛輿服二志併入

樂食貨河渠兵刑百官選舉凡十篇

卷帙繁重未及繕寫聊述其大凡於此吉水劉晉卿

同升

狀元亦曾刪定宋史江右潯經兵燹不知其書猶有存

否朱竹垞云此書改定目錄是湯義仍親筆詳東都事畧跋中

戶部郎中宗人培益仲示新著周禮左傳國語刊誤益仲舊著二十一史通鑑綱目刊誤二卷亦讀書稽古之士



居易錄卷十

欽定四庫全書

子部
周易錄卷十二

詳校官侍讀_臣陳崇本

員外郎_臣牛稔文覆勘

總校官中書_臣朱 鈐

校對官中書_臣方大川

謄錄監生_臣范光謙

謄錄監生_臣沈希曾

欽定四庫全書

居易錄卷十一

刑部尚書王士禎撰

絳州趙師尹字子衡作石鼓文音注考異其自序曰周
宣中興續雅十見籀詩石鼓之文視車攻吉日不知孰
為橐草唐貞觀中始出太史采詩之遺非孔子所刪也
後百六十餘年至韓氏愈尚臺髮無譌又三百年宋蘇
氏軾摹其文一鼓已泐間有訓注或未身詣鼓旁或并
罕見蘇本

惟潘迪陶滋親見石鼓陶與
楊慎趙宦光又皆得蘇本

競相揣量汔無

諦據元潘氏迪作音訓屢垂章止一敝字字存三百八十六今確滅又四十六世無摹本元文浸剝從誰究詰乎由唐距今幾經罅裂幾經搨損宋大觀中金填其文又經匠斲未免以說文釋籀或采諸注則又以隸釋籀矣說文所存籀書二百餘三爾其在石鼓僅九字全文七百餘三而什一不見於說文烏可以說文釋籀耶諸家詁訓言人人殊此是彼非已難踰度鼓孔子所不得見許慎所不得說而欲以意求之其於籀果何如又烏

可以隸釋籀耶天不欲斯文盡喪幸存蘇本蘇在金填

匠斷先七十載所見必真趙氏宦光為章句為補亡恃

有此爾

陶氏楊氏同

余原本六書考據諸氏糾其失六十又

三亦恃有此爾蘇不摹籀則籀已亡繼蘇摹籀籀書不

尚存天地乎茲鼓在岐陽榛莽千四百餘年而石理未

損唐至今僅千餘年大半湮沒鑿白也填金也沈諸水

也如使石能言必且曰吾出而晚於世吾厄也吾入廟

而蒙以金母寧岐陽榛莽爾匪剥奚駁匪摹奚存摹而

存非吾儒之責誰責乎余絳諸生也摹注以傳僅此爾
周宣大閱又十見籥鼓所謂樂石者也貞諸樂石留諸
太學亦曰此周詩爾孔子而在義合存周孔子之徒臚
仕朝列代不乏人奏大君附小雅與車攻吉日並垂千
古是其在後君子所引據書凡五十二部博雅士也朱
竹垞翰林著日下舊聞亦作石鼓考三卷

宋翰林學士楊億大年武夷新集二十卷景德丁未大
年在翰林所自編定也詩五卷雜文十五卷閨謝在杭

寫本大年以西崑體擅名宋初其詩在同時錢劉諸公之上覽其全集整言策絕少文皆駢體大抵五季已來風氣如此而石守道作怪說三篇刺之張皇其詞亦過矣介最推柳仲塗至擬之周孔尤妄予嘗於池北偶談辨之

古靈集二十卷宋樞密直學士陳襄述古著李忠定公綱序從孫知贛州輝跋子煜撰年譜一卷附集後詩六

卷雜文十四卷

以書啟狀序記內制奏狀劄子詳定禮文祭文議論策問易禮講義誌銘為次

亦謝氏寫本述古熙寧中在講筵論薦司馬溫公已下
三十三人各有品隲皆定論也司馬公云忠亮正直以
道自任韓持國云器識方重學亦醇正呂正獻公云道
德醇明學有原本以進賢汲善為己任蘇子容云記問
博洽長於史學國朝典故多所練達孫莘老云素有鄉
行明經術義理之學李公擇云性行醇正兼治經術可
比孫覺即莘老范忠宣公云忠義骨鯁其才足以濟大事
蘇文忠公云豪俊端方雖不長於經術然子史百氏之

書無所不覽居官敏恕尤通政事曾子固云以文學名
於時詞近典雅與軾之文各為一體孫巨源云博學能
文所守亦端可充文翰史臣之選劉革老云性行端淳
詞學淵邃置之文館必為遠器程明道云性行端醇明
於義理可備風憲之任張橫渠云學行修明養心事道
不苟仕進西方學者如載一人而已蘇頌濱云其學與
文若不逮軾而靜厚過之孔經父云性行淳粹如不能
言發為文章溫厚正直王平甫云材器磊落文亦豪邁

向居罪廢不忘進學鄭介夫云小臣愚直敢言發於忠義非陛下矜憐其志使得生還誰復為使言者讀述古薦章可想見當時人才之盛而元祐更化首相溫公申公衆正盈朝不外所薦諸君子使宰相為國用人公忠如此古云器使何以加茲今集中以此列編首而冠以紹興元年求賢手詔略云近得陳襄薦章起草司馬光而下三十三人德行言語政事文學皆所具備審如所薦斯為極矣後世瞻之仰之以襄為何如人耶

四月十二日

車駕出塞百官跪送於東華門以喀爾喀七旗部落內
附故也

宋謝邁幼槃竹友集十卷詩七卷雜文三卷謝方伯在
杭手鈔本邁臨川人逸之弟江西詩派二十五人之一
也在杭跋云幼槃詩文不傳於世此本從內府借出時
方互寒京師傭書甚貴需銓京邸資用不贍乃手自鈔
寫每清霜呵凍十指如槌幾二十日始克竣帙藏之於

家亦足詫一段奇事也萬曆己酉十二月二十四日辛酉前有苗昌言呂本中二跋幼槃詩居仁稱其似宣城非也在江西派中亦清逸可喜然涪翁沈雄豪健之氣則去之遠矣顏魯公祠堂十八學士圖諸長歌頗佳格詩如尋山紅葉半旬雨過我黃花三徑秋按莎蕉葉展新綠從與榴花開晚紅瘦藤柱下萬峯頂野鶴來歸千歲巢皆佳句又靡靡江離只喚愁眼中何物可忘憂棟花淨盡綠陰滿纔見一枝安石榴甚有風致非蘇黃門

庭中人不能道也無逸詩尤有名溪堂集視此未知何如耳

鄞人萬斯同字季野明都督表之後舉人泰之子黃宗羲太沖之弟子也投予所著禘說八篇駁鄭康成之非而據唐趙匡宋程子之說以為證其言甚辯而核又嘗補歷代史表五十四卷凡六十篇益以明史表一十三篇曰東漢世表外戚侯表雲臺功臣侯表宦官侯表將相大臣年表九卿年表曰三國漢季方鎮年表魏諸王

世表漢諸王世表吳諸王世表魏國將相大臣年表魏
將相大臣年表魏方鎮年表漢將相大臣年表吳將相
大臣年表曰晉諸王世表功臣世表僭偽諸國世表將
相大臣年表東晉將相大臣年表方鎮年表東晉方鎮
年表僭偽諸國年表偽漢將相大臣年表偽趙將相大
臣年表偽燕將相大臣年表偽秦將相大臣年表偽燕
慕容將相大臣年表南燕將相大臣年表偽秦姚萇將相
大臣年表偽成將相大臣年表曰宋諸王世表將相大

臣年表方鎮年表曰齊諸王世表將相大臣年表方鎮
年表曰梁諸王世表將相大臣年表曰陳諸王世表將
相大臣年表曰魏諸王世表異姓諸王世表將相大臣
年表西魏將相大臣年表東魏將相大臣年表曰北齊
諸王世表將相大臣年表曰後周諸王世表公卿年表
曰隋諸王世表大臣年表曰五代諸王世表將相大臣
年表吳將相大臣年表南唐將相大臣年表前蜀將相
大臣年表後蜀將相大臣年表南漢將相大臣年表北

漢將相大臣年表十國興廢年表方鎮年表李鄴嗣序
又云三國則做大事記作三國大事年表隋唐之際則
倣秦楚之際作月表觀其目錄可知其史學之淹通也
斯同兄斯大字充宗深於經學予及見所著學禮質疑
太沖序之其姪言字貞一予門人也能古文有管村文
集鄴又有陳赤衷者字葵獻亦邃於經學在太學從予
遊歿於京師嘗鈔袁桷清容集遺予又董允瑫字在中
舉人丙辰公車嘗以古文質予皆太沖門人亦早歿黃

之子百家今在京師

宋樓宣獻公鑰攻媿集八十五卷溫陵黃氏寫本詩僅
九卷雜文七十六卷諸體中題跋最勝宋集多叢冗此
集如表狀內外制書啓之類刪去半部亦可宣獻與楊
誠齋范石湖陸放翁同時詩亦石湖伯仲歌行學蘇黃
氣或不道格詩苦鈍然不為楊范佻巧取媚七字如行
盡杉松三十里看來樓閣幾由旬一百五日麥秋冷二
十四番花信風水真綠淨不可唾魚若空行無所依雖

宗調亦佳句也

樓攻媿集跋坡書三笑圖贊辨慧遠法師陶淵明陸修靜始末甚詳錄之以備參考云坡書三笑圖贊不言為誰山谷實以陶陸遠公事陳舜俞廬山記亦云舉世信之宗室彥通作廬山獨笑一編乃以謂遠公不與修靜同時予因其言細考之十八高賢傳遠公卒於晉義熙十二年丙辰年八十三而吳筠所撰簡寂陸君碑修靜卒於宋明帝元徽五年丙辰去遠公之亡正一甲子而

修靜年七十有二推而上之生於義熙之三年丁未遠公之亡修靜才十歲況修靜宋元嘉末始來廬山遠之亡已三十餘年淵明之亡亦二十餘年矣淵明生於晉興寧之乙丑少遠公三十一歲卒於元嘉四年丁卯遠亡時淵明年已五十矣固宜相從姑志之以示好事者攻媿又跋宇文廷臣所藏吳彩鸞玉篇鈔云始予讀文簫傳言吳彩鸞書唐韻事疑其不然後於汪季路尚書家見之雖不敢必其一日可辨然亦奇矣為之賦詩且

辨其為陸法言切韻茲見樞密宇文公所藏玉篇鈔則
又過之是尤可寶也既謂之鈔竊以為如北堂書鈔之
類蓋節文耳以今玉篇驗之果然不知舊有此鈔而書
之耶抑彩鸞以意去取之耶有可用之字而略之有非
日用之字而反取之部居如今本皆以朱字別之而三
字五字止以墨書字之次序皆不與今合皆不可致詰
輒書前歲所與汪氏詩跋於左庶來者得以覽觀今玉
篇唯越本最善末題吳氏三十一娘寫問之越人莫有

知者楷法殊精豈亦彩鸞之苗裔耶

攻媿跋唐昭宗賜禧實敕書云張唐英著外史禱机王建永平四年書張琳始末有云大順初禧實為黔南節度辟為推官禧字唯集韻有之與喜同他未之見鄧校書名世古今姓氏書辨證引禱机之說且曰姓書未有此氏今增入乃知姓禧而名實也又邵御史嗣堯云臨淄有泊姓又近見序齒刻錄有香姓靜姓予向於池北偶談皇華紀聞二書頗記所聞見異姓因并錄於此以

廣異聞

朱竹垞云今
構机無此條

圖繪寶鑑宋仁宗嘗畫龍樹菩薩又善畫馬徽宗宣和御墨至今流傳尤多然不聞欽宗工畫也攻媿集有恭題欽宗御畫十八學士圖云唐文皇十八學士猶在秦府蓋武德四年也仰惟欽宗皇帝毓德青宮以仁孝恭儉聞天下手臨舊畫而又親灑宸翰以誌之誠有慕於貞觀之盛云云則欽宗在儲位薰習宣和之風亦攻繪事而諸書皆不載非宣獻此跋世竟無知之者矣

五月十八日

大駕還京師二十一日內閣九卿翰詹府寺科道等衙門以喀爾喀土謝圖汗札薩克圖汗車陳汗率諸濟農那顏台吉等七旗之衆舉國內附上表賀請上尊號不許

二十一日

上御乾清門

欽選進士楊中訥等三十一人為庶吉士漢軍胡麟徵

滿洲阿金喀爾喀與焉

監察御史江蘩條奏會試事宜奉

旨與御史王承祐前疏下九卿詹事科道再議以直隸
山東為北左河南山西陝西為北右江南浙江為南左
江西湖廣福建廣東為南右四川雲南為中左廣西貴
州為中右從江請也得

旨允行著於功令

吏部尚書張士甄罷總督倉場戶部右侍郎李廷松光

祿寺卿金鼎罷

兵部尚書李天馥遷吏部尚書原任侍郎石文桂為總督倉場戶部右侍郎左通政劉楷遷光祿寺卿

國初創設兵部督捕衙門滿漢左右侍郎二人滿洲左右理事官二人漢協理督捕太僕寺少卿二人旋改左右理事官滿漢郎中各一人滿洲員外郎主事若干人漢員外郎一人主事六人分理八司治八旗逋逃及京城盜賊緝捕之事凡三營將弁之屬皆隸焉蓋古僕區

之法亦明戎政遺意也康熙辛未以三營改隸九門提督而督捕乃專司逋逃之事矣

前太子太傅保和殿大學士兼戶部尚書致仕成克鞏卒公大名人崇禎癸未進士卒年八十五無謚

六月初二日羣臣再疏請上

尊號留中

前卷記唐詩人河南劉方平累代閥閱之盛按唐書河中盧綸子姓貴盛功名著聞唐之詩人亦罕其比綸子

四人簡能簡辭宏正簡求皆有文名登進士

李衛公對文宗云云

簡能字子拙司封郎中簡辭字子策歷戶兵刑三部侍郎工刑二部尚書兼御史大夫忠武山南二軍節度使弘正字子強歷工部侍郎戶兵二部尚書武寧宣武二軍節度使贈右僕射簡求字子臧歷工刑二部尚書兼御史大夫義武隴西二軍節度使太原尹以太子太師致仕贈左僕射唯簡能不登六卿其子知猷歷兵部侍郎戶工二部尚書右僕射太子少師兼太師檢校司空

簡求子汝弼仕後唐歷官戶部侍郎贈兵部尚書簡求子嗣業禮部郎中其子文紀仕後周官至中書侍郎平章事

六月十五日進呈辛未科會試錄士禎例撰後序

朝邑李瓚中黃以其父岸翁遺墨來求跋岸翁名楷關中耆宿國初仕為寶應知縣高才凌物為忌者所中罷官平生作詩文每廣坐酒酣令兩人張絹素足紙懸腕直書略不加點如疾雷破山怒潮穿脇移晷而罷擲筆

引滿旁若無人舉坐為之奪氣名噪一時亦以此坎壈
失職傲然不屑也書學東坡尤善飛白此卷皆自書雜
詩中冥蒙二章如云天子傳粉墨臣亦舞八風古人略
小節其究莫能終小器易以滿如狂彼愚蒙晉家嗜放
達四郊生兵戎優孟何足為致身忘其崇似為南渡甲
乙時事而作關中名士予生平交善者如三原孫豹人
枝蔚韓聖秋詩華陰王無異宏撰富平李子德因篤邵
陽王幼華又旦富平曹陸海玉珂皆一時人豪要當以

岸翁為冠

李璣貽管夫人畫竹卷長丈餘離披錯落姿態百出與

怪石奔峭相間氣韻生動真奇作也後自題二句云竹

勢撒崩雲觸石應是瀟湘夜雨時皇慶三年秋日作道

昇下方有管氏道昇仲姬二印

湖州天聖寺壁有管夫人畫竹或題其旁云數

枝密葉數枝疎露壓烟啼秋雨餘宗室山河多少淚略無半點到蓀筴

璣又貽韓苑洛先生墨蹟一卷自書平陽絕句蓋四時

詞也詩云汾水春深落晚霞綠堤十里盡桃花畫船簫

鼓遊人醉漫說風流是杜家薰風綠沼碧荷香玳宴歌
兒舞袖長一醉襄陵傾百盞不知風景是平陽姑射泉
邊萬竹稠清風樓外四山秋重陽醉後歸來晚黃菊紛
紛插滿頭清曉寒霜候早朝小僮羸馬禁天遙平陽判
府催徵出檠戟重羅過豫橋自署苑洛生稿苑洛理學
經濟一代偉人而詩名不及其弟五泉之著詩亦以人
重耳

總兵官蔡元疏請修築邊牆

上命閣臣集九卿面詢可否以聞羣臣未及對大學士
伊桑阿公傳

玉音云衆志成城豈在邊牆羣臣肅然曰真大哉王言
也尋有

旨不准行

前太子太傅加太子太師保和殿大學士兼禮部尚書
致仕杜立德卒公寶坻人崇禎癸未進士卒年八十一

賜諡文端

內閣以文端文毅文肅文
定等上 欽定今諡云

巡視南城監察御史阿爾賽畢興霖阮爾詢等題為曲
全孝義以敦風化事據江南鳳陽府亳州女子王氏告
稱云該臣等看得王知禮即叛案牽連李範同之子
李殿機也其母張氏給配象房校尉王福殿機年甫三
歲因冒王姓後充校尉經鑾儀衛革退賣身鑲紅旗佛
爾海佐領下厄爾庫之家據幼聘王氏稱年三十四歲
伊叔王中凡伊兄王邁千逼嫁決志不從探得伊夫尚
存不忍即死守婦人從一之義匍匐千餘里外誓圖完

聚此女子真有丈夫行也據卮爾庫稱我本一窮巴牙喇價買李殿機供役復買蕭氏配為夫婦今重王氏節義不取伊僕身價情願斷出又不忍拆離李殿機已配之婦并許與蕭氏同歸輕財好義此巴牙喇真有義士風也據范一魁稱年六十二歲但以異姓人攜一女子同行跡涉嫌疑事干非分因喚穩婆更番驗過已得真實處女之供是范一魁憐王氏立志尋夫不顧是非成敗護持完節似亦人情所難此皆

皇上至德深仁恩濡化洽人心風俗直媲唐虞是以女子懷貞匹夫嚮義共成一段奇緣播之海內傳之千秋知聖世貞節之風超出往昔載籍之外如此臣等查在官人與旗人原有定例何敢越例妄請但王氏矢志守節冒死尋夫若不准其完聚王氏無從歸著情事可憫雖據厄爾庫稱情願斷出聽其完聚然又非現行之例臣等因事關風化仰體

皇上堯舜不忍一夫一婦不得其所至意輒敢備述上

聞格外之仁均候

審斷云云事下禮部議得李殿機先應役於象房後鬻身於旗下雖無放出為民之例但亳州女子王五姐逼嫁不從千里尋夫巴牙喇厄爾庫不取李殿機併蕭氏身價情願放出為民應將李殿機併蕭氏等准其出旗與王氏完聚仍令王氏母家給與資賠令其得所可也
康熙二十八年四月二十九日奉

旨依議予山居時於邸鈔見此疏竊歎王氏以未嫁之

弱女其夫幼更患難歷三十載生死契闊不復相聞即叔兄勸其改字亦非悖理乃崎嶇千里堅貞百折卒成其志奇哉女子真可愧世之鬚眉丈夫多矣至於厄爾庫輕財利而慕義范一魁冒不韙以全貞皆有古人之誼良史所宜大書特書者不可以無傳焉予承乏中丞時阮侍御貽以全疏刊本因節錄之

山東濟寧州民盧行之父廷輔以康熙十三年為異母弟廷獻毆死行尚幼穉及年十五其母劉氏病不起語

以父死之故令長大為父報讐行泣涕受教時廷獻避居金鄉縣行以孤孀未敢輕發乃偽與廷獻子阿黑和好若忘前事者廷獻信之康熙二十九年七月初八日廷獻醉卧行抽刃刺殺之自縛詣吏吏稽前案其族盧得捷盧廣居等詞證皆有左驗巡撫讞上下法司核擬照祖父母父母為人所殺而子孫不告官司擅殺行兇人者杖六十律熱審減等笞五十奉俞旨一時公卿士大夫無不奇行者

宗唐庚子西眉山集二十四卷詩賦十卷雜文十二卷

以論記傳贊銘誌狀
表啟書說箴疏為次

三國雜事二卷紹興二十一年朝

奉郎鄭康佐刊於惠州有鄭總呂榮義康佐及庚弟庚
子文若序徐渤興公鈔自何楷元子家藏本渤有序庚
自說云詩最難事也吾於他文不至蹇澀惟作詩甚苦
悲吟累日始能成篇史言名治察言諸論為時所稱予
錄其古今詩為二卷文賦二十二首為一卷雜事上下
為一卷都為四卷庚生三蘇之鄉又前後與東坡貶惠

州而集中無一字及之蓋庚起家為張商英所薦其貶
惠州亦以商英連染視韓子蒼異趣宜其不為眉山之
徒歟

門人莆田林禮部麟焄石來寄宗林艾山光朝林綱山
亦之陳樂軒藻林虜齋希逸四先生詩鈔艾山與朱子
同時講學有重名稱南夫子官至國子祭酒集賢殿修
撰常論曾覲龍大淵不賀張說封還謝廓然內批其立
朝大節本末如此綱山其高第弟子樂軒又綱山高弟

也。廬齋與後村同時，予曾見所著三子口義，此鈔甚略。然艾山已下，皆以道學相授受，風雅非所究心也。艾山文鈔一卷，其族孫兆珂所刻，云是鄭山齋本，僅二三十篇，又多表啟祭文，不足見其所長。後村稱其文高逼檀弓，平亦驅韓固過情之論，要是南宋一作手予昔從黃虞稷俞邵借觀全集，未及鈔錄，至今抱憾。集中有與王宣子舍人書云：讀書如飲啖，一日不得食，便如此空茶。三朝五日或不近書，卷虧耗不少，是真讀書人語。又云：

海中一山名眉洲隔岸視之約五七里許一水可到有
千家無一人讀書亦有田數十頃可耕可食魚米極易
辦可以卜室讀書隔絕人世無賓客書尺之擾令人仿
彿想像其處如桃花源也兆珂號博雅所著多識編宙
合編檀弓述注等書傳於世

殿試策例有規式違式輒不得與上第康熙戊辰仁和
凌紹雯少習清書殿試對策遂用清書漢書兩體寫之
讀卷官奏請

上裁置二甲之末

刑部尚書杜臻遷兵部尚書工部尚書陳廷敬遷刑部尚書以刑部右侍郎高爾位為工部尚書左副都御史李迥為刑部右侍郎

德清舉人陳述古字雲瞻著簪雲樓集記一事云慈溪劉仲照家有老婢其曾王父幼時人也顏如五六十許少遇道士授藥一九吞之永無疾厄亦不記某甲子為生辰但憶若干歲時倭寇犯慈曾抱小郎君避某所獲

免小郎君即仲照曾王父也從康熙戊申逆推之已百三十八歲矣

康熙三十二年京城東田家有老嫗已百三十歲日飲啖止水米一酒盃晝夜危坐形如嬰兒

楊龜山云齊桓公攘戎狄而封衛未嘗請命於天子而專封之也故春秋書城楚邱而不言其封衛蓋無取焉然則木瓜美桓公孔子何以取之曰木瓜之詩衛人之詩也衛為狄所滅桓公救而封之其恩豈可忘也欲厚

報之不亦宜乎在衛人之義不得不以為美其取之也
以衛人之義而已若春秋褒貶示天下之公故無取夫
興滅繼絕善之大者況衛人報德之辭豈得不錄龜山
以此辨詩春秋去取異同則可耳桓公大義烏可沒耶

已下三條讀楊
龜山集偶記

龜山論叔于田云仁且有禮矣而又有武焉固宜國人
之所說而歸之而詩以為不義得衆何也曰先王之迹
微而理義消亡政教不明而國俗傷敗故人之好惡不

足以當是非而毀譽不足以公善惡叔段不義而為衆所說亦以哀俗好惡毀譽不當其實故也予以為此意猶有未盡者人之賢不肖各有其黨黨羽嬖幸更相貢諛彼詎恤公論哉如淮南王之伍被左吳宸濠之李士實劉養正輩甘佐畔逆躬陷大戮此曹猶足以禮義責之乎此詩當是其黨嬖幸之屬造作以愚國人者而非其國人之愛之稱之也觀其後公子封伐京京人叛太叔段則豈國人果說而歸之哉

龜山論將仲子云共叔段繕甲治兵國人說而歸之而詩人以刺莊公何也曰叔段以不義得衆其失在莊公之不制其早也君明義以正衆使衆知義則雖有不義莫之與也雖有僭竊莫之助也尚何使人說而歸之哉民說而歸之則其取之也固不說矣故莊公雖以仲為可懷而終畏人之多言也此意亦有未盡嚴華谷云說詩者探莊公之心在於殺段而託諸父母諸兄國人以為說冀以穩成其惡耳此駁後序未盡莊公之惡則然

而說詩之本意則未也叔段舊有奪嫡之謀云云及段將襲鄭公曰可矣蓋幸其釁自彼作謂人不得以議我豈有涕泣而道之之意哉此詩正以公與祭仲有殺段之謀故設為公拒祭仲之辭以天理感動之公論開悟之耳此言深得詩意如龜山之論猶是以至誠待莊公矣

有女同車序曰刺忽之不昏於齊卒以無大國之助至於見逐云云刺字殊失詩旨張南軒曰忽之不昏於齊

未為失也而詩人追恨其失大國之助者蓋見忽之弱
為甚追念其資於大國或有以自立蓋忽者先君之世
子其立也正故國人見其逐而憐其無助嚴華谷曰突
挾宋之援以逐忽故國人惜忽之無援而作此詩曰惜
曰憐得其旨矣且忽所辭之齊女乃文姜也豈為不智
哉

李泰伯觀文章皆談經濟其本領尤在周禮一書范文
正薦之以為著書立言有孟軻揚雄之風在北宋歐蘇

曾王間別成一家予嘗病其不能詩長夏借讀盱江集
絕句間有似義山者如王方平云五百餘年別恨多東
征重得見青蛾擗麟始擬窮歡樂不奈閒人背痒何璧
月云璧月迢迢出暮山素娥心事問應難世間最解悲
圓缺祇有方諸淚不乾梁帝云凝旒南面總虛名廟祀
何曾暫割牲但學禪心能忍辱莫羞侯景陷臺城送僧
遊廬山云行非為客住非家此去廬山況不遐要見南
朝舊人物池中惟有白蓮花憶錢塘江云當年乘醉舉

歸帆隱隱前山日半銜好是滿江涵返照水仙齊著淡
紅衫皆有風致此集乃正德乙亥南城令孫甫刊本有
祖無擇及泰伯自序最為完善予家藏本差不及

新建縣令族姪懋才寄陳宏緒士業石莊集徐世溥巨
源榆溪集鈔本巨源集即吾友陳允衡伯璣所定別有
榆墩集八卷則熊人霖伯甘所刻者夏小正解東園類
語詩話伯璣本所無二君南州眉目士業之文暢巨源
之文潔觀石莊酉陽藏書鈔本書二記榆溪上愚山施

公借宋集書二君可謂真讀書人名下故無虛士也番
禺黎延祖方回亦寄其父遂球美周蓮鬚閣集至索序
美周與二君及萬時華茂先友善巨源序美周集以太
白子瞻擬之推許過情要亦崇禎末一才士也

居易錄卷十一

欽定四庫全書

居易錄卷十二

刑部尚書王士禎撰

徐世溥作諸葛武侯無成論略云諸葛之出師即周公居東之志也其盡瘁而無成功則昭烈如其不才卿可自取一言酖之也人固有終其身若渾樸寬厚而不能不敗露於將死斯言也昭烈之疑忌盡見生平深險畢露非惟昭烈不知孔明孔明亦不知昭烈甚矣彼以關張既沒老宿無人嗣子沖愚而亮以良平之才據伊周

之地一旦之後有蜀者未知為劉氏子否也故若示以
開心見誠而實豫防逆折之自取一言猶曰蜀卿之蜀
也卿欲取任自取之但勿戕吾子云耳云云予讀之駭
然古來論昭烈者曰帝寬仁大度能得人死力知人待
士有高祖之風及其託孤之際君臣肝膽相照無纖芥
形迹何其盛也即曲筆如陳壽亦曰宏毅寬厚知人待
士有高祖之風英雄之氣及其舉國託孤於諸葛而心
神無二誠君臣之至公古今之盛軌也陳后山云昭烈

謂武侯云云其勤勞一生蓋為漢計豈為子孫計哉乃
周公之用心也論忠武侯或曰三代以上人物或曰王
佐之才或曰近伊尹之出處或曰出師二表與伊訓說
命相為表裏又曰勸昭烈伐劉璋而迄取之後世不以
為貪昭烈令輔後帝曰苟不可輔公自取之孔明不以
為嫌專國一十二年後主不以為偏故魚水之契古今
美之不聞有異議也荀子論齊桓公云倜然知管仲之
能足以託國也是天下之大智也遂立以為仲父是天

下之大決也昭烈有焉世溥何人而敢於污讖先賢如此徒見其狂詩無忌憚而已薛能詩當年諸葛成何事只合終身作卧龍後人非之及周岌之難人以為口業之報該聞錄云薛能從事西川每短諸葛功業厚誣之見於詩不一而足竟不免許州之禍世溥晚死於盜安知非口業之報哉斯論也罪浮於能矣

趙清獻公集十卷衢州舊刻本有景定陳仁玉至治蒙古僧家奴鈞二序門人太倉進士曹延懿言相國鄴園

李公昔為制府鎮三衢軍旅之暇訪清獻之裔祇一農
家子目不知書呼見之為補奉祀生員居公祠側以奉
烝嘗公常有退居十詠如高齋竹軒諸遺蹟皆不可識
惟濯纓亭為後人重建今尚存族子文錦為衢守予以
修葺清獻祠堂及修補集板屬之

文潞公身都将相功名蓋世而其詩婉麗濃嫵絕似西
崑予向摘其佳句著之池北偶談趙清獻詩亦有似潞
公者殊不類其為人如暖風云薄袂歌雲散輕雲舞袖

低簾疎蕩樓閣塵暗逐輪蹄絮亂垂楊道香流種藥畦
春牕惱春思一枕杜鵑啼芳草云翠密馴文雉叢深隱
畫輪離披金谷曉寂寞茂陵春古渡班荆客長堤走馬
人芊芊似袍綠一雨一番新杜鵑云響亂書牕外人驚
夢枕中江城啼曉月澤國慙春風柳道盤餐綠桃園躑
躑紅年年來此地留恨任西東寒食云城郭青烟散郊
園麗日長鬪雞紅錦翅遊騎紫絲韁有蝶俱含粉無人
不惜芳儘拚花下飲歸去醉成鄉觀水云澄江抵練長

極目路蒼茫烟芷差差綠風荷柄柄香西流終古恨南
浦鎮時忙擬待傳辭意離人在楚鄉右數詩掩卷誦之
豈復知鐵面所為耶

江南巡撫宋牧仲中丞寄三孔文集宋中書舍人文仲
經父禮部侍郎武仲常父金部郎中平仲毅父也經父
以范蜀公薦對策九千餘言力排安石觸其怒罷歸常
父詆王氏學毅父以不行新法為董必所劾安置英州
皆元祐君子也史稱文仲集五十卷武仲集百餘卷平

仲有續世說珩璜新論諸書今三孔集通僅五卷周益公序云慶元四年太守濡須王蓮訪遺文刻之存一二於千百則三公之文在南渡之初已多散佚今所傳五卷又非慶元之舊矣三公以氣節重當世不甚工詩經父制科策首嚴王霸義利之辨剴切似劉蕡其論李訓義不顧難忠不避死而惜其情銳而氣狹志大而謀淺足破羣瞽拍肩之論常父論唐憲宗相皇甫鏘逐裴度蓋為安石惠卿輩而發蝗說謂新法之害鼠說謂熙豐

用事之人難說謂王呂之不終魯難以喻安石蜀難以喻惠卿也毅父文僅表啟無可觀蓋佳處不傳多矣惜哉

牧仲寄新刻梁苑諸集故相沈文端公龍江先生亦玉

堂集公為先太師公

諱象乾明
兵部尚書

房師是集太師所刻凡

二十八卷今本纔十卷公直方勁正有古大臣之節其

文曉暢洞達根極經傳如韓魏公司馬溫公集中議復建文年號立景泰實錄疏乞停下河南取麒麟疏請建

儲疏請並封恭妃疏乞宥議禮諸臣疏論戚畹鄭承憲
乞恤典疏議秦府進封疏因災陳言疏請罷礦稅疏納
諫疏乞免發私宅票擬疏皆關時政之大者古所謂社
稷臣也

偶過慈仁寺市得琅邪王若之集若之字湘客故明戶
部尚書基之孫也歷官叅議孤情絕照清談如晉人服
官留都放情山水買舟遊武林窮湖山之勝三忤庵寺
罷官居金陵乙酉避亂姑孰干戈崎嶇獨載三代古鼎

彞法書名畫兼兩連舳寢食與俱其答人書云正惟草
莽之中當堅守一之節遂死所與遊者鄒南臯馮少墟
鍾龍淵張藐姑李懋明左蘿石諸公皆一代偉人湘客
詩清真無啓禎氣習最工尺牘單辭片語逼似晉宋間
人絕句云素宇流孤月清光照雁聲似從千里外寄與
故鄉明驢背肩似山笠下眼如海偶見漁樵人行歌互
相待恰遇青山白水忽來細雨斜風俗駕還多高寄便
止宿於此中若言造物勞人那得伯師遮道清涼是大

藥王一拂一濯甚好片時眼界澄清鼻觀與之俱省脫
巾解帶匡牀消受荷花百頃圖書簑笠載輕舸雨雨風
風去不停疑是烟波垂釣者居然呼吸有樵青三十寒
香遶屋栽果然林下美人來狂夫自許非寥落眷屬妻
孥總是梅聯句如風雨松堂集燈殘經不明風烟無市
色時令屬山秋半將春事負始有故人來戶外惟羅雀
牀間復鬪牛如何橫白雨忽已失青山雨餘春尚冷江
上柳初眠正是春潮長還當暮雨時登高逢九日不速

恰三人扁舟乘曉霽歸棹作浮家學語兒呼吸消閒婦
鬪茶林端秋露滴草際候蟲鳴碧藻浮沈處白蓮三兩
枝皆非凡語

京師殺牛驢者最為殘忍予為中丞時嘗諭五城痛禁
殺驢者而殺牛皆回回人雖以

世祖章皇帝之誠諭不能禁也一日讀李叔則河濱集
愛牛說云肉牛者十之三革牛者十之三角牛者十之
四天下於是無全牛矣為之惻然悚然叔則古文才極

橫特未簡耳論說諸篇尤多可觀

莆田林人中字中子因其舅氏同年張給事松齡致其
先人小眉蟛蜞集乞序小眉諱喟明末癸未進士以文
章鳴甌越者也書云人中海陬末學藉先人緒餘得侍
巨公長者之側竊聞當今藝苑之中執牛耳主盤匱為
詞林繁露者首推新城阮亭先生其文章英妙足以鼓
動一時其地高華足以踔厲天下凡世之游光揚聲
者得其一言皆可附而不朽私心嚮往久矣僻居嶺澁

山川綿邈無從瞻溯龍門附灑埽之役后山一瓣香二
十年來自比白頭孝逸未嘗私以許人也側觀史策以
來文章之家吮毫濡墨仰屋梁著書指不勝屈然求其
傳也必得當時一二巨公敘而表之然後可以行遠而
垂後故以穆伯長之文待歐公而論定徐文長之集遇
中郎而始傳蓋古之君子推崇前修鼓勵後學遇其可
傳者則敘而傳之不必盡屬其夙昔之知交亦不必盡
俟其子孫之造請也人中先人壯年筮仕夙為溫陵銅

山諸公所器重及早歲里居與同社余賡之先生磨鏃古學杜門著書置身簡佚以此致忌者側目亦與賡之先生同難遺集十餘卷同鄉知言之士每以子業昌穀二公相位置殺青已久二十年藏弄篋笥未嘗妄求玄晏蓋追先人簡佚遺性非其意中推許之人斷不敢以鄭重陳乞也伏念先生泰山北斗今日之所謂歐公中郎者也而先人輒軻沈抑才不配年即歐公中郎之所致歎伯長文長者庶幾近之則以伯長文長之遺集求

當今之所謂歐公中郎者敘而傳之實先人意中之所
深願者也且以先生之文章聲氣遇世之失職無聊者
猶為游光揚聲不惜獎進而羽翼之使在當今之時有
如伯長文長者其人雖往其集猶存又重以子孫之請
謁雖無夙昔之交然推其生平簡伉不妄許可之懷一
旦有子孫焉體承先志鄭重造請當亦先生大雅所不
棄也懷抱廿年不敢以疎賤徑進謹因家舅張黃門同
年之誼託為介紹冒昧進前懇乞鑒其區區不惜一語

為其序述實先人九京之下所望以傳後無疑也主臣
嘉善魏哲嗣寄宋駙馬都尉王晉卿疊翠爭流圖一卷
有紹興御璽晉府書畫之印敬德堂圖書印范長白允
臨跋尾王翬石谷定為真蹟

李叔則楷云內典如佛塔廟一句疊三實字栢梁詩一
句七果名太白詩一絕句五地名文機故用虛非實字
則不壯予觀霧堂集多發前人所未發詩文頗奧衍聳
拔有奇氣恨才多不能裁割加聲律不叶未免拘折噪

子如昔人所譴耳六月坐朝房會議偶涓來少宗伯問
霧堂集答之如此

竹垞過邸舍云近著一書曰經義存亡考以鄭夾漈經
籍志作骨而附益之不傳者存其目其傳者略論作者
之意辨其得失蓋倣西亭授經圖兼用晁公武讀書志
之例也竹垞篤好經學所錄多鄭范氏天一閣禾中項
氏及曹氏倦圃溫陵黃氏千頃堂祕本

竹垞又言近寫得彭汝礪鄱陽集洪丞相盤洲集王炎

午吾汶集程鉅夫雪樓集予因詢竹垞所見唐人文集
自韓柳元白數集外則張曲江顏魯公獨孤及劉禹錫
元結李衛公陸宣公杜牧沈亞之呂溫李觀司空表聖
皮日休陸龜蒙羅隱皇甫湜李翱孫樵劉蛻黃滔歐陽
詹二十餘家皆予所及見者若富嘉謨吳少微李華蕭
穎士賈至李翰樊宗師梁肅盧肇馮宿劉軻之徒皆不
見其全矣

陸務觀過巴東弔寇萊公有詩云人生窮達誰能料蠟

淚成堆又一時蓋以蠟淚成堆為公貴後事耳予讀后
山談叢云萊公性豪侈自布衣夜常設燭廁間蠟淚成
堆及貴而後房無嬖幸則自其微時已然既為宰相乃
所謂無地起樓臺相公也此萊公英雄本色所以不可
及

予選五言七言詩及唐賢三昧集二書皆姜西溟徵君
序之又選唐人選唐詩自河岳英靈已下八家並以韋
莊又元姚鉉文粹為十種乞序於朱竹垞太史太史復

書云姚氏文粹既入選中則英華鼓吹三體衆妙聲畫
正音萬首絕句諸本似不應遺顧予取吳興以其獨載
樂府古調詩在五季詩道卑靡之後有復古之功非諸
家所及若英華萬首取備故博而雜鼓吹三體惟錄格
詩氣格卑下衆妙二妙亦然楊仲宏唐音品第略具而
又多紕漏不及高氏品彙之詳審聲畫止題畫之作歲
時雜詠僅節序之篇皆非文粹比也故略論之有暇當
取前諸本益以文章正宗唐人詩唐釋子宏秀集續為

一書恨安石百家選無從見之耳

陳后山云韓文黃詩有意故有工若左杜則無工矣然學左杜先由韓黃此語可為解人道

鄒忠公浩道鄉集四十卷其子柄栩所編有李忠定公序邵文莊寶後序正德七年壬申重刊本也道鄉立朝大節在諫立劉后論章惇二事其立后疏古今仰之如泰山北斗劾章惇三疏其二云元祐之朋黨方絕後來之朋黨又熾其三云惇在元祐初詆斥先帝保甲之法

以為非是其言甚力自陛下躬覽以來凡語及先帝者
槩從竄逐惟惇久置不問云云則是薰蕕不分且躋惇
於元祐君子之列其言詩矣無怪蔡京立黨人碑而惇
倖竄名其末也先生受學程門而特嗜禪理詩文多宗
門語居衡昭時古詩時似樂天格詩深穩與葉石林工
力相敵北宋之雄也零陵有市戶呂絢者嘗以錢二百
萬造大舟以俟先生後北歸呂以舟送至江南先生謝
以五絕句云平生親友漫紛紛有幾書來寂寞濱二十

萬錢捐不惜可憐湖外有斯人
瀟湘起柁出江湖日日
乾坤展畫圖白酒紅魚對妻子
鴟夷還似此行無若絢
者抑何可使其無聞哉

道鄉序括蒼易傳云先生王文公高弟也三聖之所祕
文公既發之於前文公之所略先生復申之於後先生
於斯文豈曰小補之哉則道鄉又服膺荆舒之學其立
言駿而不醇如此其曰雖居軒冕之間當有山林之氣
節義文章學術大抵皆然乃名言也又曰范丞相忠宣
公

平生奏對稱引止是孝經論語孟子周易

二則見語錄

西塘先生集九卷宋福清鄭介公俠著萬厯中其鄉人葉文忠公向高得祕閣本刻於金陵隆興甲申公之孫嘉正守建昌軍刊本也有黃祖舜序嘉正之孫元清跋云乾道丁亥侍郎簡肅林公出鎮九江鋟板郡齋淳熙改元太師左丞相史公出鎮鄉邦復取是集親為題跋而刊之蓋先生集南渡後凡三刻今本乃第四刻也先生之人所謂浩然之氣至大至剛其為詩文亦如之大

抵似石守道而無其怒張叫歎之習有德之言仁者之
勇彷彿見之古詩如古交行呈子京等篇在樂天東野
之間近體和荊公何處難忘酒一章今奸邪九原之下
猶當慙汗先生子壻即艾山林光朝也先生之弟侃登
元祐三年李常寧榜子汝石

按傳誌先生子一人
穎早卒此必有誤

崇寧

五年蔡巖榜侃子良臣紹興二年張九成榜汝石孫永
年紹興三十年梁克家榜椿年隆興元年未待問榜良
臣子恭乾道二年蕭國梁榜永年子牧之紹熙元年余

復榜椿年子嗣之開熙元年毛自知榜收之子格淳祐四年留夢炎榜終宋之世科第不絕天之眷忠義其至哉

一拂先生少隨父遊宦金陵讀書清涼山寺深為王介甫所器鄱陽楊驥來學於介甫介甫命從先生學及調光州司法叅軍讞疑獄四五事介甫在政府皆如所請任滿入京介甫勉令試法不應又令子雱壻黎東美諭意將辟為修經局檢討皆力辭且曰丞相一旦當軸發

言持論無非以官爵為先所以待天下士亦淺矣果欲
援俠而成就之取其所獻利民便物之事行其二三使
進而無愧不亦善乎介甫為先生第一知己而至於義
利之辨不稍詭隨如此若先生乃可以報知己矣

文昌雜錄單父龐文英著宋人說部之佳者予家有寫
本文英官禮部郎官丞相頴公之子也後山集有贈舅
氏龐大夫詩云傳家聲烈三公後貯腹平生萬卷餘謂
文英也後山為頴公外孫又有龐謙孺字祐甫南渡後

客吳興著白蘋集見吳興掌故

后山寄山谷書云正夫有幼子明誠好文義每遇蘇黃
詩文雖半簡數字必錄藏以此失好於父幾如小邢矣
乃知向歆無足怪者正夫謂丞相挺之明誠與婦易安
居士撰金石錄后山與丞相僚壻也小邢謂恕子居實
以順天府府尹衛既齊為都察院左副都御史

趙清獻集有劾陳恭公執中嬖妾殺婢二奏反復不遺
餘力予竊不謂然一日讀范蜀公疏言今陰陽不和財

賈民困盜賊滋熾獄犴充斥執中當任其咎臺省舍大責細暴揚燕私若用此為進退是因一婢逐一相非所以明等級辨堂陛也不覺歎服如蜀公者真可以為宰相元祐之初獨高卧不肯起其風概又出元祐諸賢之上

吾汶橐九卷安福王炎午鼎翁著炎午以生祭文丞相得名然他文乃似里社餅肆中慶弔卷軸之語晚以書干姚叅政貫學士自比於爨下之焦尾若惟恐其不已

知者誌父之墓又必於當世顯者是求此數端皆所未
喻集中惟張尉舊祠堂記頗佳不減羅鄂州社壇記存
此一篇足矣

洪文惠适盤洲集十三卷有詩無文按經籍志集八十
卷此非其全也文惠與弟文安遵文敏邁同登館閣文
名滿天下號稱三洪時朋芻炎兄弟亦稱三洪而功名
爵位遠不及此集十卷以下皆挽歌樂章詩餘無足錄
八卷九卷皆雜詠盤洲山水草木擬李衛公平泉諸詠

紫薇云十年三雁序接翅紫薇垣史稱其家居十六年
兄弟鼎立以著述吟詠自樂猶可想見其盛也其父忠
宣公松漠紀聞及景伯隸釋景嚴泉志景盧容齋五筆
夷堅志唐人萬首絕句今皆傳於世

盤洲集和景盧野處解嘲詩園池如此休言小但放芻
蕘雉免行但字注平聲與徐騎省莫折紅芳樹但知盡
意省同二公皆精說文之學也

嘗讀耶律文正詩花落餘香著莫人蓋本朱淑真詞無

奈春寒著摸人語適讀宗彭器資汝礪鄱陽集有湖湘
道中見梅花絕句云滴葉開花妙入神酥盤憶看北堂
春瀟湘此日堪腸斷隨處幽香著莫人乃前此矣唐人
唯元白集中多用此等字未暇考長慶集也經籍志汝
礪集四十卷今才十二卷

世謂東坡教壞司馬君實家僕后山談叢別記一事云
參寥如洛遊獨樂園有地高亢不因枯枿生芝二十餘
本參寥謂老圃曷潤澤之老圃曰天生靈物不假人力

寥歎曰真溫公之役也合觀二事溫公之修身齊家可
見與安石在鍾山見老兵善掃地而喜一旦誤仆燭即
大怒斥去正可互觀也

山谷云氣蒸雲夢澤波撼岳陽城不如雲中下蔡邑林
際春申君疎影橫斜水清淺暗香浮動月黃昏不如雪
後園林才半樹水邊籬落忽橫枝此論最有神解後山
詩話別記云魯直謂笙歌歸院落燈火下樓臺不如落
花遊絲白日靜鳴鳩乳燕青春深氣蒸雲夢澤云云不

如光涵太虛室波動岳陽樓此語大減上二聯雅俗判然不煩秤量下一聯孟句雄渾天成若光涵太虛室是何等語必記者之誤非黃論也

談叢記趙元考云寒食麪臘月雪水為糊則不蠹南唐煮糊用黃丹王文献公以皂莢末置書葉間然不如也辛未三四月京師不雨多風霾四月十八日職方督捕員外郎郭里入署稍早至皮市忽大風起見有神人朱衣白馬自北而南形貌甚偉風既過從人猶見其馬尾

視郭里已擲馬下所乘馬屹立于旁問之惓然不覺也
歸病三月餘始愈

太平寰宇記一百二十卷宋樂史撰世無刊本予家有
寫本闕七十餘卷竹垞嘗借鈔之又借徐氏藏本補足
六十餘卷尚闕第四卷及百十三卷至百十九卷僅闕
八卷聞金陵焦氏有宋刻本今歸吳廬澤宏侍郎

南昌王孫朱鬱儀謀埒博雅好古與周藩西亭相頡頏
著書至百種時卿名統錯撰古史記四十卷及詩解頤

等書予已著之皇華紀聞第二卷又有奉國將軍隱之名謀聖號厭原山人博雅精六書之學嘗刻薛尚功鐘鼎款識陶南村書畫史會要及江西宗派詩寒玉館帖又嘗參學於大通禪師亦一畸人

古來奸雄多工書如李斯趙高曹操鍾會劉曜王敦桓溫劉裕劉毅桓元郝超朱溫之屬下至盜賊亦有之梁虞龢論書表云盧循素善尺牘尤珍名法西南豪士咸慕其風劇賊乃亦嫻此真可怪也戴若思亦工書

虞又云謝靈運母劉氏子敬之甥故靈運能書而特多

王法昔人云王氏例能書謝氏例能詩予按謝氏自文

靖

庾肩吾書品列中之上

已來尚奕萬晦敷方明靈運惠連綜靜

眺藻皆擅書名乃至道韞亦云善書知前賢未為篤論

也

謝氏蘭玉集自安石歷梁陳凡作者十六人吳興江聞序安石移葬長興之九鵝岡見吳興掌故集

書史會要王曠導從弟與衛氏為中表故得蔡邕書法

於衛夫人以授子羲之則是右軍父子皆經衛指授也

衛授筆法於蔡琰書法之傳在二女子亦自一奇

書史會要云彩鸞不知何許人作楷字小者至蠅頭許
有大字法書唐韻極有功近類神仙吳彩鸞慕彩鸞故
名按唐韻即女仙吳彩鸞所書以若所云似屬二人南
村謬誤耶又云許渾不知何許人按唐詩人許渾潤州
人居丁卯橋名籍最著南村草草乃如此又李北海書
碑自刻之託名曰蘇靈芝乃云靈芝書生嘗為易州刺
史不知何據

廣南人以荳為茶予頃著之皇華紀聞閱道鄉集有張

糾送吳洞登絕句云茶選修仁方破碾登分吳洞忽當
筵君謨遠矣知難作試取一瓢江水煎蓋志完遷昭平
時作也又有藿荳菜詩云丹桂葉舒推重碧木蘭花發
避深紅皆可入南方草木狀也李仲賓學士言交趾茶
如綠苔味辛烈名之曰登或即登字見研北雜志

懸榻編有神化虎記事云順治乙未春三灘人甯某鋤
田次有虎搏之甯急舉鋤中其頰虎委去甯疾歸呼鄉
人躡之乃入一古廟神像頰上鋤痕宛然泥污尚濕碎

視其腹得人骨甚多始知前虎神所化也遂焚其廟而虎亦絕又汀州邱舉人長厚人也年七十餘一日夢神告曰明午有五僧到門化齋可厚待之或索酒肉恣予勿靳次日晨起如其言治具亭午果有僧五人至齋之未足又出酒肉令恣食僧喜遂巡出一籍示邱曰吾嚮者試君耳人言君長者良然君名在此籍否者厄矣遂去邱遣人尾之至林薄間五僧皆化為虎咆哮而去汀人危允藏言如此又樵川黃翁密溪人生三子俱壯矣

乙未使耕田山中晨出暮返一日鄰子告翁田蕪不治
翁心怪之詰旦三子出翁密尾之見三子入山林中自
褫衣挂樹化為虎翁大恐奔歸告其鄰拒戶匿處迨夜
三子歸扣門良久翁不敢應鄰子從室中告其故三子
曰有之帝命所驅不自由也因嗚咽呼父曰罔極之恩
寧不思報無如父命早在劫中兒輩數日遠出正求其
人可代者今事既露不可復止某衣領中有小冊幸為
簡付不然父固不利兒皆坐是死矣翁取燭覓衣領果

得小冊皆樵郡應傷虎者翁名在焉翁曰奈何三子曰
父第開門當自有策勉從之三子受冊泣拜告翁曰此
上帝之命父可蒙厚衣數重勿結帶加黃紙其上匍伏
虔禱兒當救父翁如其言三子次第從後躍過各銜一
衣虎吼而去遂不復返亦危說予往聞江都俞生述方
番司土官母安順府陶生姊化虎事著之池北偶談謂
猺獐荒僻間有此事右數事皆在閩中尤奇懸榻編南
城徐芳著芳崇禎庚辰進士字仲光亦號愚山明末曾

知澤州

茅亭客話載靈池洛帶村郝醫及利州任欄頭夫婦化虎事甚怪異

樂府拂舞歌有獨漉篇一作獨祿一作獨鹿宛委餘編子史文選訓解云罍麗小網也音獨鹿按古辭云獨漉獨漉水深泥濁蓋因水邊所見以起興漉祿鹿三字舊俱無解則作網義釋亦通

韓退之於莽鹵繆黻帖妥等字多倒用皆有據非杜撰推之玲瓏之為瓏玲嘈呿之為宏窰孟浪之為浪孟皆然若魯直以西巴為巴西則趣韻耳

如何樹名九百歲一結實形如棗長五尺

華陰王宏撰無異寄其鄉王建常仲復律呂圖說二卷
蓋本諸朱蔡叅之李文利王子魚邢雲路諸書而折衷
以自得之義建常居河渭之間早棄帖括以著述自娛
崑山顧炎武寧人訪之一見折服以為吳中所未有蓋
秦士之高尚其志者予詢王少司空嶽生祖云建常邠
州長武人


以僉都御史陳肇昌為順天府府尹

光祿寺卿劉楷詹事府少詹事兼翰林院侍講學士邵
遠平罷

粵東洋舶有攜小鶴來自海外者高三寸長二寸許素
羽丹頂喙脰皆綠與鶴無異貯以匣中置玉盃盃中貯
清水水中浸珍珠二枚鶴立盃中竟日不食時含珠於
喙旋吐於水開匣則振羽引吭而鳴聲極清越長山李
郎中予之客粵親見之粵西某山產小猴如墨色亦僅
長二寸許每千百相貫如懸絙下飲江水黠者伺其飲

發鳥銃擊之中斷而墜就江中取之無一二生得者人發殺機微物失其咸若亦毒矣哉蜀石泉猴羅江犬子亦皆以小得名荷蘭小牛白質黑文項領間有肉峯如索駝予為禮部主客主事時親見之云

辛未夏刑部李郎中斯仝市一豕將生子會李生日近私計若是日生子則捨之否則以供食其庖人是夜夢偉丈夫九人直入內寢呵之曰吾輩將有請於主翁耳明晨以告而豕適生子九李異之遂送之放生池



居易錄卷十二